

摘藻堂四庫全書薈要

集部

欽定四庫全書薈要卷一萬五千五百二十五

集部

劔南詩豪卷三十五

宋 陸游 撰

浮生

浮生真是寄郵亭
短鬢忽忽失青瞳
少始知愁有力
病增方歎藥無靈
謀生嬾似逢秋燕
訪舊疎於欲旦星
自笑若為銷此恨
濁醪聊復倒餘瓶

秋夜

高屐枯筇一老翁
燈前自笑髮如蓬
泠泠月浸荒庭竹
淅淅風凋古井桐
病思未蘇秋尚淺
醉魂初醒夜方中
故人萬里無消息
便擬江頭問斷鴻

秋夜紀懷

缺月淡欲盡
老雞鳴苦遲
聊為待旦坐
不作感秋悲
魯叟一王法
幽人七月詩
平生經世志
老死欲誰期

又

瞿曇起西域
老氏奮中州
談理一家說
蠹民千載憂
橫

流當有自獨立豈相仇垂世詩書在兒童勿外求

又

北斗垂莽蒼
明河浮太清
風林一葉下
露艸百蟲鳴
病入新涼減
詩從半睡成
還思散關路
炬火驛前迎

書懷

蕭颯新秋鬢
龍鍾未死身
不惟今日老
已是一生貧
食菜從兒瘦
關門任客嗔
世間餘一念
河雒尚風塵

林居秋日

桔槔引水遠荒畦病臥蝸廬不厭低小聚數家秋靄裏
平波千頃夕陽西亭臯艸木猶蔥蒨天上風雲已慘悽
逋負如山炊米盡終年枉是把鉏犁

七月二十四日作

閒拂青銅一惘然此生應老海雲邊涼颼入袂詩初就
幽鳥呼人夢不全天上鵲歸星渚冷月中桂長露華鮮
射鵰羽箭凋零盡坐負心期四十年

枕上作時聞臨海四明皆大水

撫枕時時猶歎歎
阨窮已極畏凶饑
雨聲浙瀝孤齋冷
客夢蕭條萬里歸
山邑風雷移蜃穴
海城水潦半民扉
如雲秋稼方相賀
一飽還憂與願違

書懷

漫道年來未極衰
窮途憔悴實難支
半分臂減休文瘦
七尺軀存曼倩飢
尚憶青衫陪衆雋
寧期白首負明時
悠然萬里煙波興
除却沙鷗總不知

秋陰至近村

卷三十五
村店閒尋酒筇枝瘦倚肩雲齊龍卷雨野曠鶴盤天露
井飄桐後清觴泛菊前欲歸還小立搔首意悠然

閒居自述

自許山翁嬾是真紛紛外物豈關身花如解笑還多事
石不能言最可人淨掃明窗憑素几閒穿密竹岸烏巾
殘年自有青天管便是無錐也未貧

秋雨初霽試筆

墨入紅絲點漆濃閒將倦筆寫秋容雨聲已斷時聞滴

雲氣將歸別起峯斜日半穿臨水竹好風遙送隔城鐘
遠遊更動輕舟興太息何人解見從

幽懷

苦茅架竹亦吾廬病起幽懷得小攄愛酒已捐身外事
閉門猶讀死前書鄰家人喜添新犢小市奴歸得早蔬
但使身安歲中熟敢辭老境落樵漁

雨後出門散步

細水穿沙溜殘雲扶雨歸不成遊酒市且作倚漁扉老

大徂年速羈窮壯志違破裘雖百結猶勝泣牛衣
病葉常先賈寒潮只暗生扶衰賴藥石隨意出柴荆細
路牛欄濕疎籬績火明枯榮不須計千古一棊枰

秋夜示兒輩

吳下當時薄阿蒙豈知垂老歎途窮秋砧巷陌昏昏月
夜燭簾櫳裊裊風縮項鰱魚收晚釣長腰粳米出新礬
兒曹幸可團欒語憂患如山一笑空

七十二歲吟

七十人言自古稀我今過二未全衰讀書似走名場日
許國如騎戰馬時秋晚雁來空自感夜闌酒盡不勝悲
渭濱星實逾千載一表何人繼出師

雨夜讀書

風雨瀕洞吞孤村讀書擁褐不出門歷觀忠邪見肝肺
直與治亂竊根原傳巖之野感帝夢此事難以今人論
危冠長劔一見用萬里耕桑吾道尊

又

一燈如螢雨潺潺老夫讀書蓬戶間但與古人對生面
那恨鏡裏凋朱顏功名本來我輩事人自蹭蹬天何慳
君看病驥瘦露骨不思仗下思天山

秋晚

聚落蕭條古埭東蘆藩蓬戶臥衰翁井桐葉盡新霜後
衣杵聲繁夕照中身似敗棋難復振心如病木已中空
村醪酸澀君無笑也解燈前作臉紅

新菊

已過重陽十日期菊叢初破兩三枝自憐短鬢蕭蕭白
不似黃花驛裏時

黃花驛在岐鳳
間予嘗過之

又

老去流年不耐催微霜又見菊花開莫言冷落西風晚
也有飛飛小蝶來

九月二十八日五鼓起坐抽架上書得九域志泣
然有感

一事無成老已成不堪歲月又崢嶸愁生新雁寒初下

睡起殘燈曉尚明
天地何由容惡德
功名正恐屬書生
行年七十初心在
偶展輿圖淚自傾

題橋南堂圖

平生不識橋南路
聞道清流帶煙樹
今朝開卷一欣然
恍若身親到其處
徐郎獨立嶷如山
招不能來麾不去
舊居萬瓦碧浮煙
結茅却就橋南住
雪盡春生水似藍
想君清獻釣魚菴
道上紅塵高十丈
斷無一點到橋南
題吳參議達觀堂
堂榜蓋朱希真所作也
僕少亦

辱知於朱公故尤感槩云

中原遺老雒川公鬚鬚白盡雙頰紅揮毫為君作齋牘
想見眼中餘子空餘子碌碌何足數獨付莊周賈生語
看君踐履四十年始知此公不輕許公今度世為飛僊
開卷使我神凜然清時臺省要才傑諸公誰致雒川客
舍北搖落景物殊佳偶作

今年冬候晚仲月始微霜野日明楓葉江風斷雁行窮
塗多藉躪老境易悲傷自笑詩情嬾蕭然舊錦囊

又

路擁新霜葉溪餘舊漲沙
栖鳥初滿樹歸鴨各知家
世事元堪笑吾生固有涯
南村聞酒熟試遣小僮賒

又

小聚鷗沙北橫林蠨舍東
船頭眠醉叟牛背立村童
日落雲全碧霜餘葉半紅
窮鱗與倦翼終勝在池籠

又

屋角成金字溪流作縠紋
斜通小橋路半掩夕陽門
孤

艇衝煙過疎鐘隔塢聞杜門非獨病實自厭紛紛

又

艸徑人稀到柴扉手自開林疎鴉小泊溪淺鷺頻來簷
角除瓜蔓牆隅斲芋魁東鄰膳肉至一笑舉新醅

自嘲

身見紹興初改元百罹敢料至今存生涯破碎餘龍具
學問荒唐守兔園獨立未除還笏氣餘生猶待闔棺論
北窗燈暗霜風惡且置孤愁近酒樽

作夢

作夢今逾七十年平生懷抱尚依然結茅杜曲桑麻地
覓句灞橋風雪天驃騎向來求作佛淮南末路望登仙
世間妄想何窮盡輸與山翁一醉眠

夜坐

杳杳霜鐘十里聲娟娟江月半窗明陳編欲絕猶堪讀
微火相依更有情九曲煙雲新散吏

時方被命再領武夷祠祿

百年

鈞槩老諸生顏然待旦君無笑尚勝聞雞賦早行

溫岐詩云

雞聲茅店月人迹板橋
霜蓋唐人早行絕唱也

北園雜詠

西村林外起炊煙南浦橋邊繫釣船
樂歲家家俱自得桃源未必是神仙

又

舍北橋東幽事多老夫飯飽得婆娑
茅簷日落聞春相荻浦煙深有櫂歌

又

小橋密接西岡路支徑溪通北崦村老子意行無遠近
月中時打野人門

又

東吳霜薄富園蔬紫芥青菰小雨餘未說春盤供采擷
老夫湯餅亦時須

又

鉏麥家家趁晚晴築陂處處待春耕小槽酒熟豚蹄美
剡與兒童樂太平

又

閒伴鄰翁去荷鋤林疎歷歷見村墟怪生白鷺飛無數
水落灘生易取魚

又

短筇行樂出柴荆雪意闌珊却變晴林際已看春雉起
屋頭還聽歲猪鳴

又

歲殘已似早春天隔水橫林一抹煙聞道埭西梅半吐

攜兒閒上釣魚船

又

白髮蕭蕭病滿身
凍雲野渡正愁人
揚鞭大散關頭日
曾看中原萬里春

又

算年身似一虛舟
付與滄波自在流
垂地雪雲吹不散
且傾桑落贈槎頭

龜堂獨坐遣悶

髮已凋疎齒已搖高談誰與慰無聊苦心雖嘔何由出
病骨非讒亦自銷玉雪細塵烹瑞艸臙脂小把斲靈苗
防風苗色紅如
臙脂可作道
賀公吳語吾能似太息遺魂不可招

又

放逐還山八見春枯顱槁項雪霜新大牀不解除豪氣
凡眼安能識貴人食有淖糜猶足飽衣存短褐未全貧
北窗坐臥君無笑拈起烏藤捷有神

復竊祠祿示兒子

得飽不啻足閉門還讀書翁猶羹不糝兒固食無魚衮
繡曷加我簞瓢常晏如人生隨所遇勿替此心初

隴頭水

隴頭十月天雨霜壯士夜枕綠沉槍臥聞隴水思故鄉
三更起坐淚數行我語壯士勉自彊男兒墮地志四方
裹尸馬革固其常豈若婦女不下堂生逢和親最可傷
歲輦金絮輸燒當夜視太白收光芒報國欲死無戰場

雪歌

黑雲黯黯如翻鷁，急霰颼颼疑投沙。初聞萬竅號地籟，已見六出飛天花。寧論異事吠羣犬，且喜和氣連千家。穿簾投隙矜嫵媚，平坑塞谷迷谿谷。遙遙林壑出玉筍，渺渺江路蟠脩蛇。扣門方擬貰鄰酒，篝火更欲尋僧茶。懸知朝士集闕角，靴聲入賀趨正衙。吾衰久矣尚何說，所幸一稔均幽遐。

春近

短褐枯筇老病身，龍鍾也復喜新春。已知不解多年仗，且作都無一事人。簷角鳥聲呼醉夢，室中花氣襲衣巾。

朝來更有欣然處一筋山蔬勝八珍

望永阜陵

聖主乘乾臨斧宸小臣承詔上丹墀寧知齒豁頭童後
更遇天崩地陷時泣至眼枯無血續夢隨魂斷獨心知
白頭才盡空濡筆寧繼生民下武詩

初拜再領祠宮之命有感

黃紙初開喜可知追懷平管却成悲生當京國承平日
仕及皇家再造時小艸出山初已誤斷雲含雨欲何施

兒孫賀罷仍無事却赴幽人把釣期

醉中信筆作四絕句既成懼觀者不知野人本心
也復作一絕

麥野桑村有酒徒過門相覓醉相扶朱門日日教歌舞
也有儂家此樂無

又

過得一日過一日人間萬事不須謀鄰家幸可賒芳醞
紅藥何曾笑白頭

又

今朝賣穀得青錢
自出街頭買彘肩
艸火燎來香滿屋
未容下筯已流涎

又

老覺人間足畏塗
怕人渾似怕於菟
晴暘頗動青鞵興
先探門前有客無

又

治道巍巍本易成
狂言安得略施行
太平事業人皆見

不計封倫死與生

臘月十九日午睡覺復酣臥至晚戲作

枕痕著面眼芒羊欲起元無抵死忙擁被却尋初斷夢
掩屏重撥欲殘香雪雲雖散寒猶緊春意將回晝已長
老去此身無著處華胥真恐是吾鄉

睡起至園中

春風忽已遍天涯老子猶能領物華淺碧細傾家釀酒
小紅初試手栽花野人易與輸肝肺俗語誰能挂齒牙

更欲世間同省事勾回蟻戰放蜂衙

北園籬外放步

北園西出路逶迤荆作門扉枳縛籬鋤麥正忙人滿野
營巢未定鵲爭枝招呼父老嘗新釀約束兒童築壞陂
遇興闌行便終日隔溪績火已參差

歲暮獨酌感懷

明時頻忝武夷僊俯仰人間只自憐總角回思如昨日
挂冠過限已三年病多晴日思行藥睡少清宵學坐禪

更歎衰孱不禁酒地黃一盞即頽然

盆池

雨送疎疎響風吹細細紋猶稀綠萍點已映小魚羣
有一拳石又生膚寸雲我來閒照影一笑整綸巾

對食

蓬藿生庭葉擁堦經旬飯豆爨枯蕪煙霄舊謂行夷路
薪水今悲繫病懷夢裏百年元易過人間萬事苦難諧
癡兒自墮閣黎計歡喜聞鐘已過齋

躑躑

少慕功名頗自奇一生躑躑鬢成絲
市樓酒美貧何預斗柄春回老不知
黑幟遊魂應有數白衣効命永無期
魚梁東畔牛欄北舉世誰能識此悲

海棠圖

人間奇艸木天必付名流菊待陶元亮
竹須王子猷我為西蜀客辱與海棠遊
再見應無日開圖特地愁

丁巳正月二日雞初鳴夢至一山寺名鳳山其尤

勝處曰味軒予為賦詩既覺不遺一字

已窮阿閣勝更作味軒遊不盡山河大無根日月浮吾
身元是幻何物彊名愁久覓卓菴處是間應可畱

初春

誰把鵝黃染柳絲似催鄰曲蹋青期已忘萬里封侯志
但憶千回上樹時朝雨池塘光潋灩暮煙樓觀碧參差
紫姑一作行藏欲問還休去身世從來心自知

雨中作

三日雨頻作昏昏饒睡眠泥濘散酒市風惡惱燈天茅
屋松明照茶鐺雪水煎山家自成趣撫枕寄悠然

又

浙浙連江雨悃悃一室幽茶甘畱齒頰香潤上衣裘泥
滓將雛鴨林樊喚婦鳩短章雖漫興聊足散吾愁

又

短鬢白如絲梅花似舊時掩屏愁入夢隱几雨催詩病
為陰天劇春緣閨歲遲非關畏車馬衰甚實難支

縱筆

氣本充天地書非汗馬牛人人見堯舜世世有巢由朝
市紅塵鬧山村白髮稠所欣吾道在江漢古東流

題慧老芋巖

煨芋當時話已新如今拈出更精神十年相國非吾願
半顆君當別付人

立春日

江花江水每年同春日春盤放手空天地無私生萬物



山林有處著衰翁牛超死地身無罪梅發京華信不通
數片飛飛猶臘雪村鄰相喚賀年豐

去冬無雪今年以正月十日巳時立

春而平旦有雪數片猶臘雪也

病中作

老軀百病集頽然仰天呼汝病勿怨天藥石幸可扶寓
形天地間疾病誰能無不從酒色來病自無根株但使
元氣在雖劇行當蘇哀哉忿慾子永棄元化爐

又

牧羊知治民解牛得養生一理儻造微何事不可明我
老抱病久頗窺古人情唐堯授四時帝道所以成周家
七百年王業本農耕造端無甚奇至今稱太平人生正
如此默默要無營心君但高拱萬物安能撓

立春日

花壓烏巾酒滿卮舊逢春日恨春遲如今病臥孤村裏
過了新春也不知

又

慶元丁巳春來晚人日初過近上元空對一樽三太息
無人為戴縷金旂

北望

中原墮風塵北望但莽莽耆年死已盡童稚日夜長羊
裘飮馬湮寧復記疇曩豈無豪俊士憤氣塞穹壤我欲
友斯人悲詫寄遐想夢行黃河濱雲開見仙掌

上元夜作

百年古謂風前燭我逾七十飯不足亦知生世無工拙

久向人間耐榮辱今年上元燈滿城十里東風度絲竹
蓬窗溼薪不禦寒獨取殘書伴兒讀忽然得意見古人
半椀凍齋甘勝肉書生蓋棺事未定論著儻存終見錄
富貴無名豈勝數意氣空能驕世俗君不見拄天拄地
邢君牙不如詩人窮賸張太祝

長歌行

不羨騎鶴上青天不羨峨冠明主前但願少賒死得見
復讐年一朝彼運衰送死桑乾川旄頭澹無光龍庭為

飛煙西琛過葱嶺東戍踰朝鮮巍巍天王都九鼎奠澗
渥萬國朝未央玉帛來聯翩黃頭汝小醜汙我王會篇
盡誅非無名不足煩戈鋌還汝以舊職牧羊遼海邊

讀書

兩眼欲讀天下書力雖不迨志有餘千載欲追聖人徒
慷慨自信寧免愚置書不讀談虛無誰其始為此創疽
古詩澤被禽與魚博施所以為唐虞正使老釋信不誣
為我未免近楊朱高軒大旆塞路衢臺閣尊顯來于于

安得禹臯日陳謨沾濡四表無焦枯坐令事業見真儒
老農不恨老耕鋤

枕上作

龍鍾七十豈前期矮帽枯筇與老宜愁得酒卮如敵國
病須書卷作良醫登山筋力雖猶健閉戶工夫頗自奇
今日快情春睡足臥聽簷鳥語多時

書志

往年出都門誓墓志已決況今蒲柳姿俛仰及大耋妻

拏厭寒餓鄰里笑迂拙悲歌行拾穗幽憤臥齧雪千歲
埋松根陰風蕩空穴肝心獨不化凝結變金鐵鑄為上
方劒釁以佞臣血匣藏武庫中出參髦頭列三尺祭星
辰萬里靜妖孽君看此神奇醜虜何足滅

夜賦

簷滴新春雨窗昏半夜燈病無詩一字窮賴酒三升
月設折酒九斗日恰得三升世路澀如棘祠官冷欲冰殘年只此是
年少解飛騰

晚步

晚步清溪上微陰忽快晴
鴉棲先小泊魚暖已羣行
藥餌扶垂老耕桑樂太平
非關戀鄉社久客倦遐征

漁歌

斜陽收盡暮煙青
嫋嫋漁歌起遠行
商略野人何所恨
數聲哀絕不堪聽

殘夢

少時鐵馬蹴河冰
老去推藏百不能
風雨滿山窗未曉

只將殘夢伴殘燈

書憤

白髮蕭蕭臥澤中，祇憑天地鑒孤忠。
阨窮蘇武餐羶久，憂憤張巡嚼齒空。
細雨春蕪上林苑，頽垣夜月洛陽宮。
壯心未與年俱老，死去猶能作鬼雄。

又

鏡裏流年兩鬢殘，寸心自許尚如丹。
衰遲罷試戎衣窄，悲憤猶爭寶劒寒。
遠戍十年臨的博，壯圖萬里戰臯蘭。

關河自古無窮事誰料如今袖手看

小舟遊西涇度西岡而歸

小雨重三後餘寒百五前聊藥瓜蔓水閒泛木蘭船雪
暗梨千樹煙迷柳一川西岡夕陽路不到又經年

春行

九日春陰一日晴強扶衰病此閒行猩紅帶露海棠溼

鴨綠平堤湖水明

杜子美曉看紅溼處花重錦官城李太白蜀江紅且明用溼字明字可謂

奪造化之功世未有拈出者

酒賤柳陰逢醉卧土肥稻壟看深耕山

翁莫道渾無用解與明時說太平

姜總管自築墓舍名繭菴求詩

君不見贅翁退隱真皇時繭室遺名星日垂雖無豪士
千車送不媿高人一鍾隨又不見貞觀故人有王顯抵
老摧頽不作繭一時戲語今尚傳人生窮達誰能免繭
菴知君出遊戲壽過期頤乃常事青松手種三千本曾
看半空翻鼓吹人老則衰君不然快瀉玉船鯨吸川釣
璜遠祖應相似八十方為筮仕年

湖上今歲遊人頗盛戲作

龍船看罷日平西
柳閣花穠步步迷
射的山前朱舫小
樵風涇上紫騮嘶

又

画船鼓吹載涼州
不到三更枉出遊
忽有歌聲出霄漢
誰家開宴五雲樓

又

翠阜青林煙壘重
朱樓画閣雨空濛
禹祠西走蘭亭路

一片湖山錦繡中

又

臺府官醅歲歲新
蘭亭春勝鏡湖春
三山小瓮雖堪笑
也向湖邊作醉人

賞花至湖上

吾國名花天下稀
園林盡日敞朱扉
蝶穿密葉常相失
蜂戀繁香不記歸
欲過每愁風蕩漾
半開却要雨霏微
良辰樂事真當勉
莫遣怱怱一片飛

算春

季子黃金盡安仁白髮新無情五更雨便送一年春難
續西樓夢空存北陌身海棠應似舊惆悵又成塵

又


綠葉枝頭密青蕪陌上溪江山妨極目天地入孤吟身
已雙蓬鬢家惟一素琴世情君莫說頭痛欲泔泔

算春

數間茅屋鏡湖濱萬卷藏書不救貧燕去燕來還過日

花開花落即經春
開編喜見平生友
照水驚非曩歲人
自笑滅齟心尚在
憑高慷慨欲忘身

劔南詩藁卷三十五



總校官庶吉士臣張能照

校對官庶吉士臣翟槐

謄錄監生臣姚鍾英

謄錄貢生臣王嘉稷

欽定四庫全書薈要

集部

劔南詩藁卷三十六

七

詳校官助教臣謝登雋



欽定四庫全書薈要卷一萬五千五百二十六

集部

劔南詩橐卷三十六

宋 陸游 撰

九里

破曉憑鞍野興濃
鷺飛先我過村東
綠鍼細細稻浮水

絳雪紛紛花舞風
陌上鞦韆喧笑語
檐頭粃粩簇青紅
誰知老子裴回意
絕愛山橫淡靄中

清暘

氣候江吳異清暘乃爾寒老增丘墓感貧苦道途難燕
子家家入梨花樹樹殘一春回首盡懷抱若為寬

一百五日行

一百五日東郊時陂塘水滿雨如絲人家青煙不禁火
俚俗豈復思子推舊墳年多木已拱新墳積土高累累
老鴉飛鳴銜肉去紙錢雨溼挂樹枝溪松茂栢死自樂
地下應笑生人悲眼中青山身後塚此事決定君何疑
風吹雲破日下照小灘碎礫光陸離停車暫憩道傍舍

解囊且補殘春詩

送李憲被召舊與其先侍郎遊從

早謁龍門鬢未秋
算年乃復接英遊
海瀕已幸見公子
瓜壘仍煩訪故侯
霖雨即陪諸老進
德星肯為一方畱
西城柳色青如許
欲挽長條特地愁

初夏

已過浣花天行開
解粽筵店沽浮蠟
酒步樣載秧船古
俗交情久豐年樂
事偏出波蓴菜滑
上市鱖魚鮮僧閣

梅山麓漁扉禹廟壩丹青不可畫得句一欣然

幽居

社結山林友家藏種樹書蔽牀欣卜宅容駟笑高閭薄
飯頻蒞韭單衣旋製練東家偕蹇罷南市買船初美景
遊俱遍鄰翁好不疎時時得樂興豈獨愛吾廬

閒適

朝讀易一卦時鈔史數行花開聊把酒睡起獨焚香寂
寂市聲遠悠悠村日長吾衰尚何恨兒女解耕桑

病中夜賦

客如病鶴臥還起燈似孤螢闔復開
首蓓花催春事去梧桐葉送雨聲來
滎河溫洛幾時復志士仁人空自哀
但使煙塵一朝靜此身不恨死蒿萊

閒身

炊煙漠漠閉柴荆聊用閒身答太平
重碧飛觴心未老硬黃臨帖眼猶明
吳蠶滿箔含桃熟穠麥登車搏黍鳴
補劓息黥今有地問君何處用虛名

書感

奪壁元知價不讎
屠龍誰信本無求
哦詩聲裏歲時速
憂國淚邊天地秋
已欠謝安俱泛海
況無王粲與登樓
此身著處憑君記
萬里煙波沒白鷗

衰病

衰病集餘日推移
成老翁衡門隱者趣
大布古人風几杖
呻吟裏山川蒼莽中
從來世緣薄不是坐詩窮

雜題

少談王霸謀身拙晚好詩騷學道疎賴有一籌差自慰
閉門不作子公書

又

莫笑花前白髮新宣和人醉慶元春何時道路平如砥
却就清漪整幅巾

又

三生元是出家人一念差來墮薦紳二寸楮冠雙屮屨
天公還我水雲身

又

黃庭兩卷伴身閒
盤篆香殘日未殘
泛泛孤身似萍葉
始知天地不勝寬

又

年華偃蹇畱不住
鬢雪縱橫耘更多
樂天不生夢得死
恨無人續竹枝歌

又

年來世事掃除盡
猶有閒吟頗自奇
安得陟釐九萬箇

為君盡寫算年詩

自傷

朝雨算雨梅子黃東家西家鬻蘭香白頭老鰥哭空堂
不獨悼死亦自傷齒如敗屐鬢如霜計此光景寧久長
扶杖欲起輒仆牀去死近如不隔牆世間萬事俱茫茫
惟有進德當自強往從二士餓首陽千載骨朽猶芬芳
雨後絕涼偶作

槐陰日色薄桐葉雨聲長林下有餘適城中無此涼浮

瓜寒水碧斲藥小鉏香未許陶潛達華簪何足忘

陶詩云聊

用應
華簪

村居

黍酒濃浮瓮瓜瓞綠映槃老便藜粥美病喜粟漿酸紗
帽新裁穩絕袍舊製寬村居亦何好聊用發詩端

久雨

水長平侵岸雲低半失村菰蒲亂鳬鴨泥潦困雞豚弄
筆排孤悶煎茶洗睡昏荒郊多狗盜及早閉柴門

七十三吟

七十三年事事新，涵濡幸作六朝民。
髮無可白方為老，酒不能賒始覺貧。
末路已悲身是客，此心猶與物為春。
柴門勿謂常岑寂，時有鄉鄰請藥人。

會稽

海近風雲惡，城南鼓角雄。
山川橫慘淡，樓閣半虛空。
故國千年鶴，征途萬里蓬。
餘生猶幾日，盡合付杯中。

泛舟

山照澄波髮鬢青
新蒲梢上立蜻蜓
孤舟每為尋詩出
輸與漁翁醉不醒

夜觀子虞所得淮上地圖

閉置空齋清夜徂
時間水鳥暗相呼
胡塵漫漫連淮潁
淚盡燈前看地圖

水村

家住煙波似畫圖
殘年不復歎頭顱
深溪竹塢見螢度
翳翳菰叢聞鳥呼
十里笳聲上雲漢
一空星影落陂湖

天公著我非無地却悔從來錯怪渠

題菴壁

萬里東歸白髮翁
閉門不復與人通
綠樽浮蟻狂猶在
黃紙棲鴉夢已空
薄技徒勞真刻楮
浮生隨處是飛蓬
湖邊吹笛非凡士
儻肯相從寂寞中

每風月佳夕輒有
笛聲起湖之西南

莫知何人意
其隱者也

又

俠氣當年蓋五陵
今成粥飯在家僧
身存但倚貧非病

齒落方慚豁可憎
踏月閒穿雙屐聽琴橫
按一枯藤
年來萬事都經遍
強笑看人獨未曾

晚歸舟中作

路入芙蓉浦
家依穉村急灘雙鷺立
平野萬鷗翻
市散人爭渡
僧歸寺掩門
淒涼誦新句
招得欲殘魂

送嚴居厚棄官歸建陽溪莊

曼容不過六百石
淵明僅留八十日
寥寥千載有兩公
海內至今推絕識
放翁貪祿老始歸
自今不作一錢直

見人勇退輒欣慕亟欲起拜忘衰疾吾廬近在官道倚
門外未掃車馬迹溪莊有地肯見分會結茅齋倚青壁
次朱元晦韻題嚴居厚溪莊圖

鶴俸元知不療窮葉舟還入亂雲中溪莊直下秋千頃
贏取閒身伴釣翁

夢中遊禹祠

湖上無人月自明夢中髣髴得閒行庭空滿地楸梧影
風壯侵雲鼓角聲世異客懷增慘愴秋高歲事已崢嶸

長歌忽遇騎鯨客
喚取同朝白玉京

感懷

老抱遺書隱故山
鏡中衰鬢似霜管
規模肯墮管簫亞
夢想每馳河渭間
竹帛竟孤千載事
江湖敢恨一生閒
殘功賴有吾兒續
把卷燈前為破顏

酒熟

侯印何由得酒泉
小槽新熟亦欣然
放翁達處過彭澤
客自在倚吾自眠

病起遊近村

老人摧顏絕造請門設常關
艸生徑一年三百六十日
三百五十九日病一日不病出
忘歸繞村處處扣柴扉
水東溪友新酒熟舍北園公
菰菜肥平生養氣心不動
黜陟雖聞了如夢從今病愈即
相尋共聽糟牀滴春瓮
秋夜讀書示兒子

久病少睡眠往往中夕起呼燈
取書讀不能盡數紙喟然置之
歎生世後闕里持螯欲測海遽
復迫老死人生

各有業唐虞本吾事詩書脫秦厄天意固在此異端塞
穹壤作俑孰為始神禹逝不還吾其如泮水

秋晚書感

丘塚相望故舊空放翁猶復寄漚中少眠危坐待窗白
得酒細傾生頰紅雖媿蛟龍起雲雨尚勝魚鳥困池籠
秋來莫道無遊興野渡村橋處處通

王成之給事挽歌辭

笭汭黃牛峽曾經白鷺洲從容參步武談笑極風流晚

預蓬萊客時從襖被遊揮毫看半醉追想只添愁

又

詩騷湘水客風度曲江公一夕南樓去千秋東省空囊
封震朝右墨敕絕宮中贈極文昌貴君恩厚飾終

書南堂壁

偶築湖邊舍侵尋四十春山丘未葬骨詩酒尚關身樵
路霜侵屨漁舟雨墊巾忝蒙鄉黨敬六聖有遺民

予生於宣

和乙巳歲

又

荒寒淺村步隱翳小茅茨偶逐漁樵住都忘歲月移閒
惟接僧話老始愛陶詩耆齒猶須幾羸然敢自期

秋晚

寒渚雁新下壞牆蛩夜吟庭莎欲無色園樹不成陰
灑孤臣淚馳驅壯士心明朝鏡中髮飽受雪霜侵

晨起待子聿歸

老人盟櫛罷坐待汝晨省忽思隔重關懷抱增耿耿小

雨暗北窗誰與慰淒冷卷書默袖手奈此清晝永懸知
河橋下亦已喚舴艋長路歸當飢呼童具湯麤

信筆

吾生本暫寓無日不可死區區遲速間何地著愠喜朝
移一株石暮引一脉水是中亦何樂一笑聊爾耳

又

有酒或一醉無酒終日間雨足通南澗木落見西山飯
飽出柴門本散腰脚頑偶然遇野人笑語欲忘還

龜堂東窗戲弄筆墨偶得絕句

身如蠶老已三眠一繭何妨自裹纏
豆飯藜羹支永日
槿籬竹屋送餘年

又

一樽且復罄幽歡不是癡頑強自寬
死去何憂累兒子
千錢可買市成棺

又

北菴睡起坐東箱無事方知日月長
天與詩人送詩本

一霎黃蝶弄秋光

又

老衰有驗詩先退
勲業無心夢漸稀
淺浦小山孤絕處
數家煙火自相依

又

老人孤寂似無家
午枕初回日已斜
偶得風和身亦健
舍南舍北探梅花

次呂子益韻

呂子奇才非復常詩來起我醉中狂大音誰和陽春曲
真色一空時世粧東閣獻諛無轍迹西湖寄傲有杯觴
病懷正待君前袞墨妙時須寄數行

舍北行飯書觸目

晚飧初潑一甌茶曳杖閒行興未涯煙樹參差墨濃淡
風鴉零亂字橫斜夕陽偏傍平橋路寒蝶猶依晚菊花
堪笑衰翁耐荒寂短衣霑露未還家

又

落雁昏鴉集遠洲青林紅樹擁平疇意行舍北三叉路
閒看橋西一片秋小婦破煙撐去艇了童橫笛喚歸牛
形容野景無餘思自怪癡頑不解愁

明日復得五字

羸病偶不死端居思出遊山寒麥苗短天濶雁聲道學
劍元癡絕脂車久罷休鄰翁獨眷眷同好自相求

又

腰痛今朝愈褰裳野興長黃鴉號亂篠碧蝶繞枯桑陂

壞良疇廢村空舊路荒十年逢九潦誰與問蒼蒼

十一月二十二日夜待子聿未歸

寒爐火半銷壞壁燈欲死人行籬犬吠月出林鵲起吾
兒信偶非長路老子可憐煎百慮人人父子與我同立
朝勿遣交河戍

南窗

暄妍一窗日的礫數枝梅小鼎煎茶熟幽人作夢回新
春又將近晚景但堪哀用底舒懷抱殘書闔復開

幽居

衰鬢蕭條笑舊青一枝棲穩寄餘齡徐行不媿衣露肘
安臥何妨席見經視客恰如堂上燕捐書那願案頭螢
時時開說前賢事聊遣鄉閭識典刑

春近山中即事

乞得松楠手自栽結茅聊喜避風埃百年孰與夢長短
萬事只如雲去來雪後梅花初半吐身閒樽酒盍頻開
錦官城外青羊路常記當年小獵回

又

節物貧家有故常
春盤臘粥逐時忙
悠悠歲月催雙鬢
艸艸雞豚薦一觴
人意自殊平日樂
梅花寧減故時香
小園新展西南角
挂樹青蘿百尺長

又

世亂王孫泣露隅
時平野老醉相扶
種楳正可三年大
愛竹何曾一日無
細路迢迢上雲雨
輕舟渺渺入菰蒲
算歸剗欲談幽勝
安得丹青為作圖

雪夜感舊

江月亭前樺燭香
龍門閣上馱聲長
亂山古驛經三折
小市孤城宿兩當
晚歲猶思事鞍馬
當時那信老耕桑
綠沉金鎖俱塵委
雪灑寒燈淚數行

將進酒

我欲挽住北斗杓
常指蒼龍無動搖
春風日夜吹艸木
只有榮盛無時凋
我欲剗斷日行道
陽烏當空月杲杲
非惟四海常不夜
亦使人生失衰老
如山積麴高崔嵬

大江釀作蒲萄醅
頽然一醉三千杯
偕問白髮何從來
歲暮懷張季長

已迫桑榆景
況逢梅柳時
功名終自誤
老病獨如期
醉眼嫌天迤
孤吟覺鬼悲
唐安在何許
無字寄相思

謝朱元晦寄紙被

木枕藜牀席
見經臥看飄
雪入窗櫺
布衾紙被元相似
只欠高人為作銘

又

紙被圍身度雪天白於狐腋軟於綿放翁用處君知否
絕勝蒲團夜坐禪

送王季嘉赴湖南漕司主管官

它人作陵邑掾笞朝算急王子乃不然袖手萬事集它
人西入都競裁丞相書王子掉頭去長沙萬里餘問子
謀身無乃左凜如霜松姿磊砢屈原賈誼死有靈計此
兩人心獨可

菴中夜興

示疾維摩無侍者夜闌自掩艸菴門有情梅影半窗月
相應雞聲十里村紙帳擁裘尋斷夢地爐撥火煖殘樽
扶衰又踐新春境萬事元知不足論

初春欲散步畏寒而歸

峭寒漠漠入重貂酒力欺人凝不消春困苦多無處賣
客魂欲斷倩誰招一溪水淺梅枝瘦四野雲酣雪意驕
欲到前村無奈嬾却尋歸路度西橋

憶答

憶昔從戎出渭濱
壺漿馬首泣遺民
夜棲高冢占星象
晝上巢車望戰塵
共道功名方迫逐
豈知老病只逡巡
燈前撫卷空流涕
何限人間失意人

戊午元日讀書至夜分有感

七十年来又四年
雨聲燈影故依然
未收浮世風漚夢
尚了前生蠹簡緣
老學辛勤那有補
舊聞零落恐無傳
先師鉢袋終當付
歎息誰能共著鞭

又

強戴羅襜怯歲增
光陰堪歎捷飛騰
簷間點滴新春雨
窗下青熒半夜燈
倚架討尋書散亂
倚屏吟嘯髮鬢鬢
極知老境惟當佚
絕學端居恨未能

雜感

志士山棲恨不深
人知已是負初心
不須先說嚴光輩
直自巢由錯到今

又

勸君莫識一丁字
此事從來誤幾人
輸與茅簷負暄叟

時時睡覺一頻伸

又

世事紛紛無已時
勸君杯到不須辭
但能爛醉三千日
楚漢興亡總不知

又

百年鼎鼎成何事
寒暑相催即白頭
縱得金丹真不死
摩挲銅狄更添愁

又

世間魚鳥各飛沉茅屋青山無古今畢竟替他愁不得
幾人虛費一生心

又

一杯濁酒即醺然自笑閒愁七十年今日出門天地別
此身如在結繩前

又

山人那信宦塗艱強著朝衣趨曉班豪氣不除狂態作
始知只合死空山

又

老子傾囊得萬錢
石帆山下買烏犍
牧童避雨歸來晚
一笛春風艸滿川

又

故舊書來訪死生
時聞剥啄叩柴荆
自嗟不及東家老
至死無人識姓名

又

忍窮待死十年間
老子誰知老更頑
溪友畱魚供晚酌

鄰僧送米續朝餐

歎老

朋儕什九墮丘墟自笑身如脫網魚
委命已悲吾道喪垂名真負此心初
齒殘僅可決濡肉眼澀知難讀細書
家事豈容闕老子兒曹努力事耕鋤

朝飢食齋麪甚美戲作

一杯齋餽飫老子腹膨脝坐擁茅簷日
山茶未用烹

又

一杯齋餽飫手自烹油蔥天上蘇陀供懸知未易同

漁隱堂獨坐至夕

斜倚筇枝岸幅巾
閉門久已謝知聞
中庭日正花無影
曲沼風生水有紋
三尺桐絲多靜寄
一樽玉瀝足幽欣
世間萬事都忘盡
惟向閒中屢策勲

讀書

讀書肝膽尚輪囷
蠹簡堆中著此身
飽識三千餘歲事
已為七十四年人
鏡中衰鬢難藏老
海內虛名不救貧

只欲從今都掃盡
剗沽春酒答新春

北望

管我初生歲中原
失太平寧知墓木拱
不見塞塵清
京洛無來信
江淮尚宿兵
何時青海月
重照漢家營

蘭

南巖路最近
飯已時散策
香來知有蘭
遽求乃弗獲
生世本幽谷
豈願為世娛
無心託階庭
當門任君鋤

古梅

梅花吐幽香百卉皆可屏一朝見古梅梅亦墮凡境重
疊碧蘚暈天矯蒼虬枝誰汲古礪水養此塵外姿

山腳散步由舍北歸

偶散東岡步因成北渚遊鴉昏先小泊魚暖欲羣浮緩
曳紅藤杖斜披紫綺裘閒身病亦可隨處得無愁

又

幽徑欣行藥衰年因負薪梅殘香更遠艸動綠初勻魚
似濠梁樂鷗如海上馴度橋成一笑微健及新春

又

空碧升團月江郊弄夕霏生涯今始是年事古猶稀冰
解魚初躍風和雁欲歸興來忘遠近艸露已沾衣

寄題連江陳氏拂石軒

李似之嘗
有歌詞

平生聞說西江水百丈齋淪浹見底漁舟來去白鷗飛
上有綸巾隱君子作詩自許輩陶謝獻傲煙雲弄清泚
紛紛聲利滿人間耳本不聞安用洗李公過江號高流
逸氣凜凜橫清秋沙邊一笑偶邂逅掃石蔭松相獻酬

浩歌聲斷七十載尚寄萬壑風颼颼放翁老憊狂未歇
買船欲作西江遊

得張季長書以大蓬見稱蓋以予寄祿官視管祕
書監也因作五字寄之

老病江湖上煩公問死生僊蓬雖誤到殘錦只虛名近歲

裁損濫恩所謂十色錦者所存亡幾點滴三更雨淒涼萬里情向來遺恨

極不遂隱青城

病足累日不能出菴門折花自娛

頻報園花照眼明
蹒跚正廢下堂行
擁衾又聽五更雨
屈指元無三日晴
不奈病何拋酒醖
麤知春在賴鶯聲
一枝自浸銅瓶水
喜與年光未隔生

書意

帝命煌煌敕百神
方傾天漢洗邊塵
但須荊州一好漢
安用商山四老人
竹帛恐貽千古笑
江湖未媿百年身
此心欲與何人說
病足呻吟又過春

新燕

天上不用翦刀催山杏溪桃次第開要信今年春事早
社前十日燕新來

北巖采新茶用忘懷錄中法煎飲欣然忘病之未
去也

槐火初鑽燧松風自候湯攜籃苔徑遠落爪雪芽長細
啜襟靈爽微吟齒頰香歸時更清絕竹影踏斜陽

連日至梅僊塢及花涇觀桃花抵暮乃歸

千載桃源信不通鏡湖西塢擅春風舟行十里畫屏上

身在西山紅雨中俗事挽人常故故夕陽歸櫂莫怱怱
豪華無復當年樂爛醉狂歌亦足雄

又

桃花塢近釣魚磯不比劉郎萬里歸水底紅雲迷醉眼
樽前絳雪點春衣病依几杖猶能出老愛風光未忍違
天偕清遊每竊日夜溪炬火候柴扉

劍南詩藁卷三十六

欽定四庫全書薈要卷一萬五千五百二十七

集部

劍南詩藁卷三十七

宋 陸游 撰

病中作

破裘縫夏暖糲食美無餘
摩詰病說法虞卿窮著書
身羸支枕久足蹇下堂疎
今日晴窗好幽懷得好攄

題郭太尉金州第中至喜堂

安康甲第天下傳
玉題繡井摩雲煙
落成鼓吹震百里

意氣欲壓秦山川第中築堂最宏麗奎畫岌岌蛟龍纏
知公所喜在勇退顧視解組如登仙公心雖爾天未可
終倚北伐銘燕然十年宿衛功第一小却臥護長淮邊
帳前犀甲羅十萬幙下珠履逾三千願公小緩高枕計
即今河雒猶戈鋌出師雞鹿擁皂纛畫象麒麟我玉蟬
是時公喜客亦樂為公滿瀉黃金船

算春

山陰又見算春初禁火園林社雨餘世事不妨隨日改

年光未遽與人疎
豉香下箸嘗蓴菜
鹽白開奩得鱖魚
艸艸一杯終可喜
數間茅屋亦吾廬

小園新晴

散髮陽狂不計年
園林只在小窗前
斷虹千尺卷殘雨
新月一鉤生
算天臘釀拆泥
畱客醉山茶
落磴喚兒煎
物華心賞元無盡
剗住人間作地仙

又

衰病猶煩藥石功
殘春終日在園中
地偏幽艸為誰綠

雨霽新花如許紅足蹇扶持須穉子杯淡暖熱賴鄰翁
此身雖向閒中老若比休休却未同
司空表聖休休亭
歌曰休休休莫莫
莫伎倆雖多性靈惡
賴是常教閒處著

春晚感事

據鞍千里何曾病閉戶安眠百病生每憶嘉陵江上路
插花藉艸醉清明

又

寒食梁州十萬家鞦韆蹴鞠尚豪華犢車輾輾歸城晚

爭碾平蕪入亂花

春晚園中作

杏子青青梅子酸
山園轉眼又春殘
老懷豈復小年樂
病骨不禁清曉寒
學術背時甘義墮
功名無路久心闌
蠶收麥熟吾何恨
但遣銀杯似海寬

題夷堅志後

筆近反離騷
書非支諾臯
豈惟堪史補
端足擅文豪
馳騁空凡馬
從容立斷鰲
陋儒那得議
汝輩亦徒勞

幽居

小舫藤為纜幽居竹織門短籬圍藕蕩細路入桑村魚
膾槎頭美醅傾粥面渾殘年謝軒冕猶足號黎元

聞鳥聲有感

小市提壺酤濁酒東陂脫袴插青秧歸來靜臥茅簷底
如覺閒中白日長

又

流年冉冉去無情日夜溪頭布穀聲城郭雖存人換盡

令威應悔學長生

與子虞子坦坐龜堂後東窗偶書

時鳥朝暮鳴芳艸日夜生春風捨我去歲律俄崢嶸綴
簇繭白白出陂稻青青鳴機織苧葛暑服亦已成小兒
結山房窗戶頗疎朗萬事不挂眼朱黃浩縱橫佳哉東
北風吹下讀書聲功名詎敢望且復慰父兄

是日午間
聞子聿在

山半讀書
相與欣然

行年

行年過七十與世兩相忘
墨沼龜魚樂藥園芝朮香
吾生一蟲臂世路幾羊腸
楮弁新裁就脩然學道衰
新作兩褚冠

東窗小酌

烏帽翩僊白苧涼
東窗隨事具杯觴
流年不貸世人老
造物能容吾輩狂
藤葉成陰山鳥下
檜花滿地蜜蜂忙
何人畫得農家樂
咿軋縑車隔短牆

又

市塵遠不到林塘
嫩暑軒窗晝漏長
蠶妾趁時爭鹽繭
農夫得雨正移秧
徒行有客驚頑健
爛醉無人笑老狂
却掩菴門徑投枕
鼾聲雷起撼藜牀

西林傳菴主求定菴詩

粥後鐘魚未動時
夜燈仍對碧琉璃
不須更說能生慧
枯木寒灰也自奇

又

業力驅人舉世忙
西林袖手一爐香
未能成佛渾閒事

十劫看渠坐道場

夏日

將雛燕子漸離巢
過母龍孫已放梢
日出竝湖初曬網
雨餘窳屋旋添茅
家貧舊業元知廢
身老微官久合拋
莫恨門前車馬絕
豈無農圃與論交

又

過眼春光久已空
曬絲擣麥又匆匆
新泥滿路梅黃雨
古木號山月暈風
角黍焚新聞罇俎
靈符墨涇照房櫳

歲華不為衰翁駐且付餘生一笑中

又

吳中五月暑猶微竟日南堂坐掩扉綠樹露

一作霧

香鶯

獨語畫廊風惡

一作急

燕雙歸三千界內人人錯七十年

來念念非投老萬緣俱掃盡從今僧亦不須依

又

雨斷雲歸旋作晴尚餘紅溼在簾旌燕雛掠地飛無力
梅子臨池墜有聲米糲解包供午餉萍齋傍枕析朝醒

此翁不負碩軀處捫腹時時繞舍行

又

梅雨初收景氣新太平阡陌樂閒身
陂塘漫漫行秧馬門巷陰陰挂艾人
白葛烏紗稱時節黃雞綠酒聚比鄰
掀髯一笑吾真足不為無錫更歎貧

夜酌

酒淥孤燈夜梅黃細雨天聊成顧影醉
復作曲肱眠腰下蘇秦印囊中趙壹錢
丈夫隨所遇底處不陶然

夏夜

夏夜誰知亦自長幽居渺在水雲鄉月侵竹簟清無暑
風度衣篝潤有香棲鵲自驚移別樹流螢相逐過橫塘
放翁尚苦餘醒在細綆銅餅落井牀

又

山崦風生鵬嘯悲柴門月上樹陰移熏衣汗雨初乾後
把卷蚊雷不動時孤悶難禁終歲病浮生易滿百年期
釣竿只待清秋近一棹煙波信所之

又

展轉紗幮睡不成一藤扶億繞廊行月昇雙鵲移枝宿
露下孤螢綴蔓朶汲井忽驚人已起開門堪歎事還生
羽衣道帽從吾好柏子煙中起磬聲

又

龜息綿綿破五更起扶藤杖竝南榮擇栖孤鵲尚三匝
司旦老雞俄一鳴移坐徐看山月吐脫巾聊受水風清
不知竟是真仙未夜夜神遊白玉京

泛舟

水鄉元不減吳松短櫂沿洄野興濃鬱鬱冬青森翠葆

離離夜合散紅茸

水涯多此二樹

村溪初度穿林笛寺近先聞

出塢鐘歸路夕陽猶滿岸憑舷一笑覽衰容

感舊

要識梁州遠南山在眼邊霜郊熊撲樹雪路馬蒙羶慘

淡遺壇側

拜韓信壇至今猶存

蕭條古廟墻

沔陽有蜀後主所立武侯廟

百詩

猶可想歎息遂無傳

予山南雜詩百餘篇舟行過望雲灘墜水中至今以為恨

又

夜涉南沮水朝過小益城梯山天一握度棧土微平雨
近秦雲暗霜高隴月明至今孤夢裏唱馬有遺聲

喝馬
皆七

字韻語聞之
悲愴動人

又

早發金堆市更衣石櫃亭灘聲秋後壯山色雨餘青道
濤愁車轍橋危避駝鈴功名竟何在撫事感顏齡

又

塵土暗貂裘森然白髮稠年光真衮衮吾事竟悠悠馬

宿平沙夜

軍中馬及廐卒夏夜皆露宿沙上

烽傳絕塞秋

平安火並南山來至山南

城下故人零落盡追寫只添愁

又

凜凜隆中相臨戎遂不還塵埃出師表艸棘定軍山壯
氣河潼外雄名管樂間登堂拜遺像千載媿吾顏

又

我思杜陵叟處處有遺蹤錦里瞻祠柏綿州弔海棕蹉

跼悲樞驥感會失雲龍生世後斯士吾將安所從

書喜

雨足郊原正得晴地縣萬里盡春耕陰陰阡陌桑麻暗
軋軋房櫬機杼鳴亭鼓不聞知盜息社錢易歛慶秋成
天公不負書生眼畱向人間看太平

自詠

平生萬事付憨癡兀兀騰騰到死時夜踏亂雲過略約
曉分寒溜注軍持東薪山客招烹石渡海蕃僧乞製碑

作箇生涯君勿笑，挂天勲業亦兒嬉。

露坐

立秋前五日

旋削甘瓜進酒卮，斷雲漠漠斗離離。
北臨積水風來壯，東恨長林月上遲。
秋近不堪聞急杵，夜涼已復怯輕絺。
天孫老抱河梁恨，豈獨人生事可悲。

又

岸幘臨窗意未便，又拖筇杖出庭前。
清秋欲近露霑艸，皎月未升星滿天。
過埭船爭明旦市，踴車人廢徹宵眠。

齊民一飽勤如許坐食官倉每惕然

親舊或見嘲終歲杜門戲作解嘲

十年蕭散住林間只是幽居不是閒
續得茶經新絕筆補成僧史可藏山
詩題紫閣憑雲寄藥報青城附鶴還
自笑何曾總無事枉教人道閉柴關

北窗

寒泉斷藕素絲長紋簟開瓜碧玉香
午睡覺來桐影轉無人可共北窗涼

新秋以窗裏人將老門前樹欲秋為韻作小詩
殘暑無多日幽居近小江酒醒中夜起松月入山窗

又

陸子江海人所願守節死潮生釣瀨邊月落菱歌裏

又

小智每自私大患緣有身孰能忘彼已吾將友斯人

又

野艇千錢買明當泛渺茫但能容一棹家具不須將

又

立朝紹興間猶及見諸老魂夢不可逢丘坟開秋艸

又

朝真方捨杖步月始開門零落山花後經旬掩綠樽

又

唐虞雖已遠至道豈無傳度日一編裏懷人千載前

又

秋風昨夜來聲滿梧桐樹故人渺天末此夕誰與度

又

少年雖婚宦淡然本無欲婆娑三畝園自歎不啻足

又

無食妨何事吾兒可散愁焚香正巾褐聽汝讀春秋

食新有感貧居久蔬食至是得肉

壯遊車轍遍天涯晚得祠官不去家優老每慙千載遇
食新又歎一年加出波魚美如通印下棧羊肥抵卧沙
捫腹笑歌仍索酒不嫌鄰舍怪譁譁

秋夕露坐作

銀河半落露華清
南斗闌干北斗明
冉冉方悲老將至
纖纖又歎月初生
酒牀細滴香浮瓮
衣杵相聞聲滿城
萬卷讀書無用處
却將耕稼報昇平

有年

不向神林乞雨晴
天公自解相西成
急符收盡無逋賦
新酒沽多足笑聲
外戶徹扃停夕柝
齊民相勸力春耕
傳聞夜市連三鼓
却恨龐公不入城

大雨

北風挾驕雲突起塞宇宙赫日初未西盼轉失白晝翻
空黑幟合列陣奇鬼鬪雨鏃飛縱橫雷車助奔驟平階
水入戶溝瀆不能受對面語不聞持繖避屋漏兒童抱
圖書衣屨那暇救縱暴理豈長忽已收簷雷北鄰更相
勞拮拾如過寇老子獨癡頑長歌對醇酎

東西家

東家雲出岫西家籠半山西家泉落澗東家鳴珮環相

對籬數掩各有節三間芹羹與麥飯日不廢往還兒女
若一家雞犬意自閒我亦思卜鄰餘地君勿慳

予自春夏屢病至立秋而愈作長句自賀

良藥扶衰抵萬金漸加糜粥輟呻吟溪風拂簟有秋意
山影半庭生夕陰薄俗只成驚老眼幽居正得遂初心
岸巾待月欄干曲更覺天公愛我深

七月十一日雨後夜坐戶外觀月

浴罷淡無事岸幘臨前軒雷雨始退散雲月相吐吞風

蟬斷還續枝間終夕喧露螢闔復開熠熠綴艸根殘暑
會當去孰敢厭炮燔四時莽相代所歎歲月犇歡悵挽
不畱白髮生無根兒女日夜長子且復有孫澗松偶未
薪野鶴猶孤騫華表幸來歸餘事何足言

王與道尚書挽詞

朗朗百間屋汪汪千頃波直能彰主聖清不願人知許
國多艱日逢辰獨斷時人猶望霖雨殄瘁不勝悲

又

咎遇開藩日嘗叨下榻榮從容陪讌笑傾倒及平生偕
譽言猶在懷知涕易橫終慙五字句不盡百年情

初秋

雨氣排殘暑風聲送早秋拂窗開葉落繞井看螢流卧
起須人助炊春尚自謀蕭條歲將晚百慮入搔頭

感秋

秋色關河外秋聲天地間壯士感此時朝鏡凋朱顏一
身寄空谷萬里夢天山噫嗚怒皆裂憤激悲涕潛古來

真龍駒未必置天閑長松倒澗壑委棄同菴管得志未
可測談笑濟時艱凜然出師表一字不可刪

北窗試筆

老來日月速去若弦上箭方看出土牛已復送巢燕清
晨覓縑衣正午廢紈扇北窗小雨餘盆山鬱蔥禱病體
為之輕一笑玩筆硯雖無顏柳工揮灑亦忘倦紙窮墨
漸燥虵蟻爭入卷屬兒善藏之勿遣俗子見

秋思

秋毫不受俗塵侵隨處悠然一散襟天際挂虹初斷雨
雲頭翳日又成陰引泉北澗長澆竹拂榻西窗自斲琴
藥石掃空身便健始知萬事要無心

又

雨長蒼苔滿釣磯坐令秋暑歛餘威天高月破殘雲出
野曠風驚蠹葉飛終歲鉏犁猶不飽萬家碁枰獨無衣
早知竟坐儒冠誤射虎南山未必非

又

身似龐翁不出家一窗自了淡生涯山薑零落初成子
石竹淒涼半吐花寒澗挹泉供試墨墮巢篝火喚煎茶
掩關本意君知否兩耳衰年不耐譁

又

老懷不慣著閒愁信脚時為野外遊過雁未驚殘月曉
片雲先偕一天秋村醅似粥家家醉社肉如林處處留
七十已稀今又過問君端的更何求

新涼

山居謝來客病體喜新涼幽艸上牆綠落花霑土香捐
書心自息聽雨夢偏長菰葉鄰人餉欣然獨舉觴

又

菰首初離水薑芽淺漬糟粳香等炊玉韭美勝炮羔露
下殘蕪溼風生萬木號從今更何事痛飲讀離騷

自遣

踽踽人間未死身鄉閭共敬六朝民睡無由著緣多感
醉不能成坐一貧幽屏最憎蟲弔夜狂吟略似鳥鳴春

也知世俗誰知我猶待君王獵渭濱

自規

曲肱飲水彼何人汝獨何為厭賤貧大節勿汙千載史
少時便盡百年身圖書幸可傳遺業雞黍何妨約近鄰
今日仲秋還小雨剗鉏麥壟待新春

鄉人謂八月一日
得雨宜來年麥

感舊末章蓋思有以自廣

庚寅歲入巴東硤卧聽清猿月下聲二十九年窮未死
却思當日似前生

又

百堂小益最初程
朱棧青崖照眼明
十日經行圖障裏
時時馬上聽鶯聲

又

路入梁州似掌平
鞦韆蹴鞠趁清明
未論日遠長安近
且喜南山天際橫

又

青城山裏屏風疊
太華峰頭腰帶鞵
跨鶴橫空吾欲去

九秋月露看青冥

秋日獨酌

艸木秋始繁黃碧照籬落雖云各有時意緒終索莫
老人固多感對此聊命酌風霜肅萬物過雁在寥廓
吾當識其大微物不足託何以豁曠懷短章可時作

夙興

艸堂風雨少睡眠骨冷始覺非壯年水鳥長鳴聲戛然
庭中樓鴉亦已翩老人清餓如龜蟬起坐甚愛小窗妍

一生宦遊膏火煎歸來杜門氣麤全人看雖不直一錢
知我自有穹穹天賦詩豪成棄不傳殘鐘斷磬知誰編

身世

身世浮沉等一漚卧看校尉例封侯青燈微火藥鐺夜
淡月淒風衣杵秋醉裏不辭嘲兀兀吟邊時得寄悠悠
即今老眼無開處又向城南倚寺樓

憶筭

憶自梁州下益州身閒處處醉江樓早知虛起彈冠意

悔不常為秉燭遊詩思已慙馳陣馬目光猶覺射車牛
蓮峰日觀何時到下看人間萬里秋

豐歲

豐歲驩聲動四鄰溪秋景氣粲如春羊腔酒擔爭迎婦
鼉鼓龍船共賽神處處喜晴過甲子家家築屋趁庚申
老翁欲伴鄉閭醉先辦長衫紫領巾

村居

孤村淺浦近江城西折坡陀一嶺橫墟落煙生含暮色

園林風勁作秋聲
年豐租稅無逋負
酒熟鄉鄰遞送迎
老病愈知難報國
只將高枕送餘生

中秋夜半後無雲而月色微淡尤為絕景

輕煙薄靄九霄寒
素月渾如隔縠看
此夕洞庭應更好
誰能從我跨青鸞

夜賦

老人不食覺魂清
恍若身遊白玉京
夜靜月驚林鵲起
水涼風颭露荷傾
昏燈一點窺孤夢
畫角三終轉五更

欲醉海山還嬾去且攜羽扇憇青城

遣興

學廢文章傳世少身閒車馬過門疎壯心易盡羸肩酒
義氣肯貪熊掌魚列聖仁恩深雨露兩京宮闕尚丘墟
素懷華渭嗟誰問且作狂歌楚接輿

秋賽

柳姑廟前煙出浦冉冉縈空青一縷須臾散作四山雲
明日來為社公雨小巫屢舞大巫歌士女拜祝肩相摩

芳茶綠酒進雜還長魚大截高嵯峨常年徵科煩箠楚
縣家血溼庭前土妻啼兒號不敢怨期會常憂累官府
今年家家有餘粟縣符未下輸先足木刻吏蒲作鞭自
然粟帛如流泉儲積不愁無九年

寄題周丞相平園

先生道心平如砥秋毫忿慾何曾起漫將周易著牀頭
本不洗心那洗耳先生國論如砥平三朝倚之作權衡
泰階兩兩元不動自然萬里無欖槍如今歸來曲肱卧

世事無窮俱看破不栽桃李不鋤蘭山僧野叟時來過
吾儕七十固已壽更到期頤亦何有倘知生死本自平
拈放一邊如把酒

雨三日歌

秋風戒寒雨三日空村無人算蕭瑟北窗書生萬卷書
齒豁頭童真可惜輪囷新蟹黃欲滿磊落香橙綠堪摘
興來尚能氣吞酒詩成不覺淚漬筆士生蓬矢射四方
掃平河雒吾儕職湖中隱士倘可逢握手與君談至夕

戲作治生絕句

治生何用學陶朱少許能慳便有餘
惜酒已停晨服藥
省油仍廢夜觀書

龜堂雜題

龜堂端是無能者妄想元無一事成
最後數年尤可笑
飽餐甘寢送浮生

又

癡頑老子老無能
遊惰農夫酒肉僧
閑著菴門終日睡

任人來喚不曾應

又

長腰玉粒出新春
秋穫真成畝一鍾
衣食麤供官賦足
何妨世世作耕農

又

冷雨蕭蕭澀不晴
亂書圍坐正縱橫
忽聞小瓮新醅熟
急喚兒童洗破觥

偶讀陳無已芍藥詩云一枝剗欲簪雙髻未有人

間第一人蓋晚年所作也為之絕倒戲作小詩

少年妄想已癡絕鏡裏何堪白髮生縱有傾城何預汝
可憐元未解人情

村舍

過埭六七里竝江三四家潮生魚滬短風起鴨船斜世
守桑麻業長無市井譁

雨中作

雨聲可愛秋方見睡味無窮老始知半醉擁衾支倦枕

誰能三復放翁詩

江郊

白艸江郊算青帘野店秋喧呼估船客嵬我飲家流老
豈題橋柱愁惟倚寺樓更傷昏澀眼煙際數歸牛

閒趣

被擁聽秋雨兒扶上夜香甌炊霜後稻糟漬社前薑馬
病空思路僧歸却住房風扉久嘔軋鐸認艣聲長

又

飯滿七綴鉢香凝百衲窗雨聲酣曉枕燈燼落秋釭疾
豎元知遜天魔亦已降超然對兒子未媿鹿門龐

又

老至衰滋劇秋高病尚侵坐看兒學字卧聽客彈琴困
滿雀方鬪栖寒雞欲瘖世情元自嬾不是事違心

小飲

莫笑放翁顛歌呼覆酒船雙螯初斫雪珍羞已披緜寒
雨連旬日新橙又一年更須重九到作意菊花前

作字

整整復斜斜
翩如風際鴉
書成半行艸
眼倦正昏花
未辨倉盛筆
寧能錐畫沙
老夫端可媿
頭白不名家

晝睡起偶賦

蝴蝶與蒙莊
頽然寓一牀
日隨香篆過
夢逐雨聲長
酒喜新篳綠
橙如故歲黃
昏昏還隱几
誰識老龜堂

小舟過吉澤效王石丞

澤園霜露晚
孤村煙火微
本去官道遠
自然人迹稀
木

落山盡出鐘鳴僧獨歸
漁家閒似我未夕閉柴扉

湖山雜賦

門前天鏡倒千峯
舍後菰蒲與海通
乘興出遊無遠近
煙波何處覓孤蓬

又

一生到處賈胡畱
身屬官倉不自由
白首歸來更何恨
十年爛醉石帆秋

又

東西相望兩湖橋來往無時一畫橈買酒每尋村市步
煮蔬時就野僧寮

又

不到梅山二十霜望中常似隔他鄉一杯罌粟紗燈下

最憶初寒宿上方

梅山寺與敝廬南北相望
無二十里然不到最久

又

煙中一棹小江秋憶上牛頭倚寺樓今日籬邊殘照裏
却從西北望牛頭

太息

早歲元于利欲輕但余一念在功名白頭不試平戎策
虛向江湖過此生

又

書生忠義與誰論骨朽猶應此念存砥柱河流僂掌日
死前恨不見中原

又

自古才高每恨浮偉人要是出中州即今未必無房魏

埋沒黃沙死即休

又

關輔堂堂墮劫塵渭城杜曲又逢春
安知今日新豐市
不有悠然獨酌人

學書

九月十九柿葉紅閉門讀書人
笑翁世間誰許一錢直
窗底自用十年功老蔓纏松飽
霜雪瘦蛟出海挐虛空
即今譏評何足道後五百年言自公

晚興

壯遊車轍遍天涯
晚落農桑不自知
許國雖堅身遽老
讀書未倦眼先衰
雲深嶺路樵歸晚
雨細江亭渡發遲
一事猶堪慰孤寂
錦囊傾倒有新詩

秋晴見天際飛鴻有感

新晴天宇色正青
羣鴻高騫在冥冥
兒童相呼共仰視
我亦扶杖來中庭
豐年到處稻粱滿
胡不暫下栖沙汀
應須江海寄曠快
肯為霜雪嗟飄零
書生可笑不自喜

憔悴久翦籠中翎鷗波萬里每媿杜鶴化千載知非丁
風前哀號漫激烈月下孤影常竚竚詩成欲寫復嬾去
誦似溪水聲泠泠

初寒獨居戲作

開殼一作皺得紫栗帶葉摘黃甘獨卧維摩室誰同彌勒

龕宗文樹雞柵靈照挈蔬籃一段無生話燈籠可與一作
自談可

夢觀牡丹

忘却晨梳滿把絲
揀花嫌不似
臙脂起來一笑看清鏡
惟插梨花却較宜

書喜

水際柴荆鍵不開
野人相覓漫敲推
寒鷗陣黑疑雲過
老木聲酣認雨來
酒價日低常得醉
官租時辦不勞催
平生未省如今樂
却笑倚觀誤見哀

又

今年端的是豐穰
十里家家喜欲狂
俗美農夫知讓畔

化行蠶婦不爭桑酒坊飲客朝成市佛廟村伶夜作場
身是閒人新病愈賸移霜菊待重陽

又

滿川秋穫重赧肩拾穗兒童擁道邊夜夜江村無吠犬
家家市步有新船奪攘不復憂山越安樂渾疑是地仙
惟有衰翁最知達避人猶記建炎年

小飲罷行至湖塘而歸

社酒真如粥面濃朱顏頃刻換衰容霜輕已覺樹搖落

雲起始知山疊重梅市魚歸衝雨棹寶林人定隔城鐘
此翁大似遊僧樣爐煖窗深又過冬

病雁

祠祿將滿幸麤支朝夕遂不敢復有請而作是詩

蘆洲有病雁雪霜摧羽翰不辭道路遠置身湖海寬稻
梁亦滿目鳴聲自辛酸我正與此同百憂雙鬢殘東歸
忽十載四忝侍祠官雖云幸得飽早夜不敢安乃知學
者心羞媿甚飢寒讀我病雁篇萬鍾均一簞

澤居

澤居僅足不求餘曠快真同縱壑魚平日酷憎蠅附驥
算年肯作鶴乘車齒搖但煮岷山芋眼澀惟觀胄監書
此際自應還往絕本無心與俗人疎

秋穫歌

牆頭累累柿子黃人家秋穫爭登場長碓擣珠照地光
大甌炊玉連村香萬人牆進輸官倉倉吏角冷不暇嘗
訖事散去喜若狂醉卧相枕官道傍數年斯民阨凶荒
轉徙溝壑殪相望縣吏亭長如餓狼婦女怖死兒童僵

豈知皇天賜豐穰畝收一鍾富萬箱我願鄰曲謹蓋藏
縮衣節食勤耕桑追思食不饜糟糠勿使水旱憂堯湯
戊午重九

朋舊相望天一涯登高結伴只鄰家秋風自欲吹紗帽
衰鬢何曾泥菊花藥市神仙思益部鮐盤節物記京華
自憐病後歡悰薄小醉歸來日未斜

重九懷獨孤景略

昔逢重九日初識獨孤君竝轡洮河馬聯詩劒閣雲已

悲吳蜀遠更歎死生分
安得持卮酒澆君丈五坟

晨鏡

晨起覽清鏡有叟鬢已皤
馘黃色類梳面皺紋如鞞熟
視但驚歎初不相誰何久乃
稍醒悟舉手自摩挲與汝
周旋久流年捷飛梭生當老
病死求脫理則那切勿彊
撐拄據鞍效廉頗惟須勤把
酒暫遣衰顏醺

秋霽遣懷

陸生少日心膽壯萬里憑陵
寄疎放玉關曾誓馬革裹

滄海豈憂魚腹葬人生富貴本細事釣築逢時俱將相
正令不遇亦何慊藥鑊丹爐老青嶂今年秋晚苦多雨
三十六溪新綠漲極知世事不足論霽日小舟行可榜
屏迹

咎者航濤江雲山迎我東擊楫誓江神永託冥冥鴻十
年桑榆暖萬事馬牛風邇來愈屏迹庭戶深蒿蓬就甕
挹新醕偷畦擷晚菰隣曲或念我小鮮亦時供喟然撫
几歎恨今已龍鍾向使早十年何媿柴桑翁

初寒

今日霜露冷凜然悲算秋垂帷跨微火發篋出輕裘
徂歲逝將換殘生愈覺浮一杯還自閔小獵記梁州

風雨

風雨從北來萬木皆怒號入夜殊未止聲亂秋江濤
渺然老書生白頭卧蓬蒿閉門不敢出裂面風如刀
鄰人閔我寒牆頭過濁醪時哉一昏醉新橙宜蟹螯

龜堂自詠

龜堂一老翁，短褐立秋風。
時過同籬菊，身衰似井桐。
新霜萬瓦白，朝日數櫺紅。
且復尋書卷，悠然度歲窮。

又

采藤持織履，剝楮治為冠。
看劍心空壯，騎驢骨本寒。
病多辭酒伴，老甚解祠官。
予十月奉祠歲滿不復敢請
賴有扁舟在，秋濤萬里寬。

閒居初冬作

香枕蒲團又一新，天將閒處著閒身。
東窗換紙明初日，

南園移花及小春婦女晨炊動井臼兒童夜誦聒比鄰
早知閤巷無窮樂悔不終身一幅巾

病中排悶

面骨崢嶸鬢雪新承平版籍有遺民

予生於宣和中

心雖願繼

無傳學力不能支已廢身開卷眼昏如隔霧擁爐肺渴
欲生塵老龐亦有兒孫念付與天公不問人

李秋已寒節令頗正喜而有賦

霜降今年已薄霜菊花開亦及重陽四時氣正無愆伏

比屋年豐有益藏風色蕭蕭生麥隴車聲碌碌滿魚塘
老夫亦與人同樂醉倒何妨卧道傍

劔南詩豪卷三十七

謹案卷三十七第十四頁後八行噫鳴怒皆裂刊
本皆訛背據唐宋詩醇改

第十五頁前一行未必置天閑刊本閑訛間據唐
宋詩醇改

欽定四庫全書





總校官庶吉士臣張能照

校對官庶吉士臣翟槐

膳錄監生臣姚鍾英